

ENYELO

LE JOANI

*Enyelo ka Jesu Kristu:**Enyelo k'Akambu Waya ka Ndja*

1 Enyelo ka Jesu Kristu, kakawusha Unyashungu dia menya ekambi andi akambu waya ka ndja. Ndi akakitumi le ondjelo andi dia nkienya ukambi andi Joani. 2 One lakatelaka antu diui dia Unyashungu, ndu diui dia Jesu Kristu, ndu akambu tshe wakandenya. 3 Untu tshe ladia, ndu wane wuka akambu wahatayi ane, la wakitanya akambu wambufundama loko, weli la otshoko, ne dia etena k'akambu ako kaya suki.

Mikanda le Ekelezia Esambeli

4 Joani le Ekelezia esambeli wa lu Asiya:

Ngandji ka mamba kayali la nyu, ndu ki uma le one leko, ndu lakiko, ndu laya ka ndja, ndu uma le Nyuma esambeli yeli la ntundu ka kiti kandi ka diulelu; 5 ndu uma le Jesu Kristu, omenyi a kolamelu, ona enundu lakulwama uma lu nyoi, umbuledi a khumi ya dikanga ya la kete.

Le one latutukaka ngandji, ndu lakututshungula uma lu kolo yasu la dikila diandi; 6 lakatete akanga a diulelu, la elombedi a Unyashungu Shi; lutumbu la diulelu wayali le ndi pundju pundju!

Ayali osoku! 7 Enda, ndi uyayi lu ang. Ashu tshe wayuwena, ndu wane wakawungula dikonga. Ku wedja tshe wa la kete wayulela dia dikambu diandi. Elu. Ayali osoku!

8 Khumadiondjo Unyashungu kata ati: Dimi Alafa la Omenga, leko, lakiko, laya ka ndja, Kanga-Wulu-Tshe.

Enelo lu Disenga Dia Patemo

9 Dimi Joani unyanyu, ulungudi la nyu wa pa ndu wa diulelu ndu w'etetemalu le Jesu, laki lu disenga, dietawo vati: Patemo, ne dia diui dia Unyashungu, la diui dia Jesu. 10 Dimi laki le Nyuma lu lushi la Khumadiondjo. Ku lakuki diui dia wulu l'okongo ami uku pungi 11 ati: Ufundu akambu wenaye lu buku, uditumi le Ekelezia

esambeli: l'Efeso ndu la Smurina, ndu la Perengamo, ndu la Tuyatira, ndu la Saradi, ndu la Filadelefiya, ndu la Laodikiya.

12 Dimi lakewo dia mena one lakamvutela diui. Ku lam'akamewo, dimi lakenyi dikitshelu dia paunyi esambeli di'atala. 13 L'atei a dikitshelu diako kaki untu omotshi lufanyi la On'a untu, olotshi dihondo tshu ndu l'ekulu andi, ndu uya wa paunyi lu tulu. 14 Ote andi ndu divu diandi waki wema uku diosa dia wema di'okoko, kana uku pembe. Ashu andi waki uku lumbi la dja. 15 Ekulu andi waki uku ohotela walongosolawo, uku ohotela watshumbawo lu khuka ka dja. Diui diandi diaki uku dihelela di'ashi efula. 16 Ndi aki la toto esambeli lu lunya landi la pam. Yombo ya diesa wedi ehendi yakatumbi uma l'unyo andi. Elundji kandi kakahete uku unya mbayahete wulu.

17 Lam'akamawenyi, dimi lakayahumanya l'ekulu andi uku untu lambuvu. Ku ndi akamunanda la lunya landi la pam, ata ati: Tukaki woma. Dimi leli etatelu ndu ekumelu, 18 ndu one leli lumu. Dimi lakavu, enda, leko la lumu pundju pundju. Dimi leko la sapi ya Nyoi ndu ya Udimu a Pengandu. 19 Okone ufundi akambu wakayenyi, la akambu weko, ndu akambu wayuyala l'okongo; 20 akambu wushami wa toto esambeli takayenyi lu lunya lami la pam, ndu wa dikitshelu dia paunyi esambeli di'atala. Toto esambeli teli andjelo wa Ekelezia esambeli. Dikitshelu dia fesa esambeli dieli Ekelezia esambeli.

Mukanda le Ekelezia ka l'Efeso

2 Ufundeli ondjelo w'Ekelezia ka l'Efeso wati: Aui wa one latukimelaka toto esambeli lu lunya landi la pam, latokendakenda l'atei a dikitshelu dia paunyi esambeli di'atala ane.

2 Dimi mbeyaka etsha aye, ndu ulimu aye, ndu etetemalu kaye. Dimi mbeyaka nti: We hetawo akanga wa kolo, we akahimbi wane watuyaetaka vati: Atumami mbesu, ku vo kema atumami, we akawaenyi la lukesu. 3 We aki la etetemalu, akasuwu ne dia

lukumbu lami, we kumpeko. 4 Keli dimi la ye dikambu! ne dia we akakimo ngandji kaye ka ntundu. 5 Okone uho lene akayako, ukadimuli utema, utshi uku etsha aye wa ntundu. Naka aha osoku, dimi layuya le ye esadi, layunya ekitselu kaye ka tala uma lu dihuli diato, naka we hakadimula utema. 6 Keli we eko la dikambu ne, we atuhetshaka ditshelu di'asi Nikolao, ndu dimi katudihetshaka. 7 One leli la tui, uki aui watela Nyuma Ekelezia. One laleka akambu wa kolo wulu, dimi layuwusha dia ndi nde uma l'utamba a lumu weli l'atei a Paradisu ka Unyashungu.

Le Ekelezia ka la Smurina

8 Ufundeli ondjelo w'Ekelezia wa la Smurina wati: One laki uma l'etatelu edja ndu l'ekumelu, lakavu, keli akayala la lumu ntu, kata akambu ane ati:

9 Dimi mbeyaka asui aye, ndu wula aye (keli we eko kanga ongonyi), ndu tengo ya wane wata vati: Asi Juda mbesu, keli vo kema asi Juda, weli uku etemwelo ka Satana. 10 Tukaki akambu wayangaye nsuwa woma. Ulungi, uhimbanyi uyanga mbidja amotshi anyu lu lukanu dia nyuhimba, keli nyu nyayusuwa nshi dikumi. Utetemali edja ndu lu nyoi, ku dimi layukusha dembo dia kusu dia lumu. 11 One leli la tui, uki akambu watela Nyuma Ekelezia. One laleka akambu wa kolo wulu, hasuyama lu nyoi ka hendi.

Le Ekelezia ka la Perengamo

12 Ufundeli ondjelo w'Ekelezia ka la Perengamo wati:

One leli la yombo ya diesa wedi ehendi kata akambu ane:

13 Dimi mbeyaka dihuli diudjashiye, lene eli kiti ka diulelu ka Satana. We ambumamema lukumbu lami wulu, kumanguna mbetawo kami ndu lu nshi yaki Atipa omenyi ami, kanga kolamelu, lakadiakema l'atei anyu, lene udjashi Satana. 14 Keli dimi la ye akambu amotshi, ne dia we la amotshi leko watetawoka wetshelu wa Balama, wakandetsha Balaka dia nkitsha utamba a ntakanya la ntundu ka Isariyele, dia vo nde diango diakwadiakela dikishi, la dia vo munana. 15 Ndu we eko pupu la amotshi watetawoka wetshelu w'asi Nikolao. 16 Okone ukadimuli utema. Naka aha osoku, dimi layuya le ye esadi, layolo la wo ta la yombo y'uma l'unyo ami. 17 One leli la tui, uki okone atela Nyuma Ekelezia. Dimi layusha one laleka akambu wa kolo wulu mana yakashama; layuwusha ndu dive dia

wema, dieli la lukumbu l'uyuyu lufundami loko. Nduku untu layeya, tshikima lulungudi.

Le Ekelezia ka la Tuyatira

18 Ufundeli ondjelo w'Ekelezia ka la Tuyatira wati: On'a Unyashungu, leli la ashu uku lumbi la dja, la ekulu uku ohotela wakalongsowama, kata akambu ane.

19 Dimi mbeyaka etsha aye, la ngandji kaye, la mbetawo kaye, la ekambelu kaye, la etetemalu kaye. Ndu dimi mbeyaka nti: Etsha aye wa l'okongo wambuleka wa la ntundu waki. 20 Keli dimi la ye dikambu, ne dia we ambetawo umuntu uku Jezebele, latuyataka ati: Umvutshi a umuntu mbemi. Ndi atetshaka, atunganyiaka ekambi ami dia vo munana, ndu dia vo nde diango diadiakelawo dikishi. 21 Dimi lakawusha etena ka ndi nkadimula utema, ku ndi hetawo nkadimula utema uma lu munanyi. 22 Nyulungi, dimi lutsha mbukitsha lu tangi, ndi la wane watunanaka la ndi, lu fono ka wulu, tshikima vo wambukadimula etema uma lu etsha andi. 23 Dimi layudiaka an'andi. Ekelezia tshe kaweyi vati: Dim'ako katushishimaka ashu w'ekongo ndu etema, ku layunyufuta untu l'untu uku etsha anyu. 24 Keli dimi lambunyutela, nyu wane weli la Tuyatira, wahatayala la wetshelu one, ndu wahateyi akambu a waki wa Satana, uku watawo. Dimi halanyahatanya wutshu ukina. 25 Keli kanyukimeli akambu anyu wulu edja ndu lam'ayumuya. 26 One laleka akambu wa kolo wulu, ndu lalama etsha ami edja ndu l'ekumelu, dimi layuwusha wulu wa mbulela wedja. 27 Ndi ayuwauela la ukalimba a luwulu, uku atuwulaka puki ya diwumba vwa, uku akamalungula wulu uma le Papa. 28 Ku dimi layuwusha sunga yoto. 29 One leli la tui, uki okone atela Nyuma Ekelezia.

Le Ekelezia ka la Saradi

3 Ufundeli ondjelo w'Ekelezia ka la Saradi wati: One leli la nyuma esambeli ya Unyashungu ndu la toto esambeli kata aui ane: Dimi mbeyaka etsha aye. We eko la lukumbu uku untu lasena, keli we ambuvokaka. 2 Ewoki, ushikike akambu wutshikadi wuyangi mvo, ne dia dimi kuntana etsha aye wuluwanyimi lu ashu a Unyashungu ami. 3 Uho okone akayetawo, ndu akayuki. Ukitanyiaki akambu aso; ukadimuli utema. Naka we hewo, dimi layuya uku uvi; we heya etena kayumuya. 4 Keli we eko la kumbu y'antu amotshi la Saradi, wahatalanya ahondo awo. Vo

ENYELO

wayengola la mi wolotshi ahondo a wema, ne dia vo mbukuki ololo. 5 Okone one laleka akambu wa kolo wulu, ayoilotshama ahondo a wema. Dimi haludimula lukumbu landi uma lu mukanda a lumu, keli layushula lukumbu landi lu ashu wa Papa, ndu wa andjelo andi. 6 One leli la tui, uki okone atela Nyuma Ekelezia.

Le Ekelezia ka la Filadelefia

7 Ufundeli ondjelo w'Ekelezia ka la Filadelefia wati: One leli ekila, leli mete, leli la sapi ka Davidi, latudihulaka, ku nduku untu ladiha; latudihaka, ku nduku untu latudihulaka, kata aui ane.

8 Dimi mbeyaka etsha aye. Ulungi, dimi lambuketela lukuki hwe, nduku untu leya ludiha. We la yema ya wulu, akakitanyiaka diui diam, kumanguna lukumbu lami. 9 Enda, dimi lambukusha wa l'etemwelo ka Satana, wane watutaka vati: Asi Juda mbesu, keli vo kema asi Juda, kashi katawo. Ulungi, dimi layuwaela dia vo ntemola l'ekulu aye, la dia vo mbeaya vati: Dimi lambukulanga. 10 Ne dia we akakitanyi diui di'etetemalu kami, dimi layukulama uma lu unya uku w'ehimba, wayuyala le wa la kete tshe, ne dia mpimba wane wudjashi la kete. 11 Dimi layuya esadi. Ukimeli keli la ye wulu, untu takokosolaki dembo diaye dia kusu. 12 One laleka akambu wa kolo wulu, dimi layuwete uku ekoho ka lu etemwelo ka Unyashungu ami; ndi hatumbi uma loko pundju. Ku dimi layufunda lukumbu la Unyashungu ami lu dimba diandi, ndu lukumbu la usumba wa Unyashungu ami, Jerusalema y'uyuyu, yayuya uma l'ulungu uma le Unyashungu ami, ndu lukumbu lami l'uyuyu. 13 One leli la tui, uki okone atela Nyuma Ekelezia.

Le Ekelezia ka la Laodikiya

14 Ufundeli ondjelo w'Ekelezia ka la Laodikiya wati: Ayali osoku! Omenyi wa kolamelu la mete, etatelu k'etungelu ka Unyashungu, kata aui ane.

15 Dimi mbeyaka etsha aye nti: We kema tshitshi, kema dja. Utumulanga ku we ndjala tshitshi kuyanga dja. 16 Okone ne dia we eko djungudungu, aha dja, aha tshitshi, dimi layukohongola uma l'unyo ami. 17 Ne dia we kata wati: Kanga ongonyi kemi, lambukundja ukundji, hahumbi nduku engo. We heyi wati: Kanga lunyangu keye, ndu okei ndu wula, ndu tshungu, ndu utakataka. 18 Okone dimi lambuketula nti: Usumbi paunyi le mi yakawalongsola la dja, dia

we ndjala kanga ongonyi; ndu ahondo wa wema, wa ndota, sonyi ka utakataka aye katukenama; ndu iso ka mbidja lu ashu, dia we nsena. 19 Dimi latulakaka, latusuyaka wane wukami ngandji. Okone ukalangani, ukadimuli utema. 20 Enda, dimi lambemala la suku, lambokokola. Lam'ayuka untu diui diami, lam'ayundudihula lukuki, dimi layoto le ndi, layole la ndi, ndu ndi ayole la mi. 21 One laleka akambu wa kolo wulu, dimi layuwusha wulu wa ndi mbidjase la mi lu kiti ka diulelu, uku akamaleki akambu wa kolo wulu, akamadjase la Papa lu kiti kandi ka diulelu. 22 One leli la tui, uki okone atela Nyuma Ekelezia.

Kiti ka Diulelu ka l'Ulungu

4 Lam'aketi akambu aso, dimi lakendi, ku lakenyi lukuki lambudjaho l'ulungu. Diui dia ntundu diakamuki diaki uku diui dia pungi, diamvutela ati: Umbeli lindu ndjukkenya akambu waya ka ndja. 2 Kem'edja dimi laki lu Nyuma. Dimi lakenyi kiti ka diulelu kukitshami l'ulungu, ndu untu udjashi loko. 3 One lakadjashi loko aki la elundji uku dive dia awadiawadi dia tilili. Ngulu kakatshimbi kiti ka diulelu kakangadimo uku dive di'eleselese. 4 Kiti kina ya diulelu akumi ahendi la nyei yakadingi kiti kako ka diulelu. Dimi lakenyi dikumanyi akumi ahendi la nei wudjashi lu kiti yako, wolotshi ahondo a wema, wulimbe fula ya paunyi. 5 Angadimu wa ndjadi ndu aui w'antu, ndu akhungula wakatumbaka uma lu kiti kako ka diulelu. Atala esambeli wakahetaka dja la ntundu ka kiti ka diulelu, weli nyuma esambeli ya Unyashungu. 6 La ntundu ka kiti ka diulelu kaki uku uduwa wa talatala, uku dive dia ngaingai ka mamba l'atei a kiti ka diulelu.

Lu etshimba ato kaki nyama nyei yaki la lumu, yaki la ashu etundu tshe, ndu la ntundu ndu l'okongo. 7 Nyama ka ntundu kaki uku tambwe, ka hendi kaki uku osongo a ngombe, ka satu kaki la elundji uku ka untu, ka nei kaki uku fudu ka pungi katafumbo. 8 Nyama sho nyei yaki la ahafu asamalu asamalu. Yo yaki la ashu utundu tshe ndu l'etei. Yo hayumuya kuyanga la yanyi kuyanga l'utshu, yatutaka vati: Ekila, ekila, ekila, eli Khumadiondjo Unyashungu, Kanga-Wulu-Tshe, lakiko, leko, laya ka ndja. 9 Nyama yako yayutumbula, yayolemia, yayuka one latudjaseka lu kiti ka diulelu lusaka, leli la lumu pundju pundju. 10 Dikumanyi so akumi ahendi la nei wayukhusamela ako ludjashi lu kiti ka

diulelu, wayotemola one leli la lumu pundju pundju. Vo wayukitsha alembu awo wa kusu wa diulelu la ntundu ka kiti ka diulelu, wata vati: 11 Khumesu, la Unyashungu asu, we kukuki Dia nungula lutumbu la kenemo la wulu, Ne dia we kakatungi diango tshe. Dio diakatungama uma lu lulangu laye.

Buku Diaki la Tulimbitelu Esambeli

5 Dimi lakenyi buku diufundami l'atei ndu uma l'okongo, diukelekami wulu la tulimbitelu esambeli lu lunya la pami la one lakadjashi lu kiti ka diulelu. 2 Dimi lakenyi ondjelo a wulu ahangohango la diui dia wulu ati: Untu akona ukuki mbifula wombom a buku one, la ndjihula tulimbitelu teli loko? 3 Nduku untu l'ulungu, kuyanga la kete, kuyanga la tshina dia kete, lakeyi mbifula wombom a buku oso, kuyanga menda loko. 4 Ku dimi lakaleli efula, ne dia nduku untu lakatanema lukuki mbifula wombom a buku aks, kuyanga menda loko. 5 Ku ekumanyi kemotsi akamvutela ati: Tulelaki. Enda, Tambwe ka lu wudja wa Juda, khumbu k'uma le Davidi, lakaleki akambu wa kolo wulu, ambukuka dia mbifula wombom a buku uku la dia ndjihula tulimbitelu tawo esambeli.

Wambotemola Ona-Okoko l'Ulungu

6 L'atei a kiti ka diulelu, ndu wa nyama nyei, ndu wa dikumanyi, dimi lakenyi Ona-Okoko emadi uku akandadiakema. Ndi aki la sekis esambeli la ashu esambeli, weli nyuma esambeli ya Unyashungu, yakandatumi lu kete tshe. 7 Ku ndi akayi, akose wombom a buku uma lu lunya la pami la one lakadjashi lu kiti ka diulelu. 8 Lam'akandose wombom a buku, nyama sho nyei la dikumanyi akumi ahendi la nei wakakhusamela Ona-Okoko. Untu l'untu aki la losese, ndu alonga wa paunyi wakaludiami la malashi, weli dombelo di'ekilami. 9 Ku vo wakimbi usambu w'uyuyu, wata vati: We kukuki dia nungula wombom a buku one, Ndu dia ndjihula tulimbitelu tawo, Ne dia we akadiakema, Akasumbela Unyashungu antu la dikila diaye: W'uma lu wauhu tshe ndu w'eteketa tshe, Ndu w'uma lu wehu tshe, la waulelu tshe. 10 We kawaete uku diulelu la elombedi le Unyashungu asu; Vo wayulelaka la kete. 11 Ku dimi lakendi, lukuki aui w'andjelo efula wudingi kiti ka diulelu ndu dikumanyi. Efula kawo kaki nunu akumi wa nunu akumi, ndu nunu dia nunu, 12 wahangohango vati: Ona-Okoko lakadiakema kukuki dia nungula wulu, ndu ongonyi, ndu yimba, ndu diulelu,

ndu kenemo, ndu lutumbu, ndu otshoko. 13 Dimi lakuki diango tshe diakatungama ndu l'ulungu ndu la kete, ndu la tshina dia kete, ndu l'ashi a wuki ndu diango tshe dieli loko, wata vati: Otshoko, la kenemo, la lutumbu, la diulelu, wayali le one ludjashi lu kiti ka diulelu, ndu le Ona-Okoko pundju pundju! 14 Ku nyama yako nyei yakati vati: Ayali osoku! Ku dikumanyi wakakhusama, wakötemola.

Dihhwelua ka Tulimbitelu: Djimbitelu ya Ntundu

6 Dimi lakenyi lam'akadihula Ona-Okoko djimbitelu motshi ya lu tulimbitelu esambeli, ku lakuki nyama kemotsi uma lu nyama nyei kahangohango uku dikhungula dia mvula, kata ati: Yaka! 2 Dimi lakendi, menyi ku falasa ka wema kene, la one lakakiahemi aki la uta. Wakawusha dembo dia kusu, ku ndi akatshu atalembia, ndu dia ntolembia.

Djimbitelu ya Hendi

3 Lam'akandadihula djimbitelu ya hendi, dimi lakuki nyama ka hendi kata ati: Yaka! 4 Ku falasa kekina ka tilili kakatumbi. Wakasha one lakakiahemi wulu wa minya ki uma la kete, ndu dia vo ndjakana. Wakawusha yombo ya wuki.

Djimbitelu ya Satu

5 Lam'akandadihula djimbitelu ya satu, dimi lakuki nyama ka satu kata ati: Yaka! Dimi lakendi, menyi ku falasa ka tshududu kene; one lakakiahemi aki la yediko ya mbedika wutshu lu lunya landi. 6 Dimi lakuki diui uku dia untu l'atei a nyama sho nyei, diata ati: Yediko otoi y'epunga wa menge yeko denariyo otoi; tediko tusatu ta epunga wa yeleta denariyo otoi, keli tulanyaki iso la wanu!

Djimbitelu ya Nei

7 Lam'akandadihula djimbitelu ya nei, dimi lakuki diui dia nyama ka nei diata ati: Yaka! 8 Dimi lakendi, menyi ku falasa k'ekesekese kene. Lukumbu la one lakakiahemi laku Nyoi; Udimu a Pengandu akatüyelaka. Wakawasha wulu wa mbulela etenyi ka nei ka kete, dia vo mbaidiaka la yombo, la ndjala ka kasha, la elandu, ndu le nyama ya l'ukunda ya la kete.

Djimbitelu ya Tanu

9 Lam'akandadihuli djimbitelu ya tanu, dimi lakenyi nyumu ya wane wakadiakema

ENYELO

la tshina di'ediakelu, ne dia diui dia Unyashungu, ndu dia diui diakawakimela. 10 Vo wakawana la diui dia wulu, wata vati: Yee! Khumadiondjo ka ladiku k'ekila la ka mete, edja ndu etena kakona kayuyulumbuya ndu kayuyosomboya dikila diasu le wa la kete nye? 11 Vo wakashu untu la untu ukutu a wema; wakawatela vati: Nyutukumuya etenyi, edja ndu lam'ayuwudiaka anyanyu ekambi la anengenyu, lam'ayuwushidiya lutumu lawo.

Edihwelu ka Djimbitelu ya Samalu

12 Dimi lakenyi lam'akandadihula djimbitelu ya samalu, kete yakadidima efula. Unya akayala tshududu uku dikuniya dia diosa, utundo a ngondo akayala uku dikila. 13 Toto ta l'ulungu takako la kete, uku atololololoka elua uma l'utamba a fingu weki apepe, lam'asutshasutshamawo la loheledi la wulu. 14 Ndu ulungu wakanyema; wakawombe uku atowombaka wombo wa buku; ndu ekungu tshe ndu asenga wakanyema uma l'ahuli awo. 15 Ndu khumi ya dikanga ya la kete, ndu antu a waki, ndu embuledi w'alimbi, ndu akanga w'engonyi, ndu akanga a wulu, ndu fumbi tshe, ndu wudjasedi tshe, wakashama lu weuku w'ave wa l'ekungu; 16 watela ekungu la ave vati: Nyutukungweli, nyutushe uma lu ashu wa one latudjaseka lu kiti ka diulelu, ndu uma lu kele ka Ona-Okoko, 17 ne dia lushi la vuiki la kele kawo lambukuka. Akona eya memala?

Wambudja Ekambi a Unyashungu Tulimbitelu

7 L'okongo w'akambu aso, dimi lakenyi andjelo anei wemadi lu atshuku anei wa kete, wukimedi pepe nyei ya la kete, ne dia loopepe talopepaki la kete, kuyanga l'ashi a wuki, kana ladiku di'etamba. 2 Dimi lakenyi ondjelo ukina atambela utsua l'ulungu uma lene atutumbaka unya, ukimedi djimbitelu ya Unyashungu a lumu. Ndi akaweleta andjelo ako anei, wane wakawasha wulu wa nanya kete ndu ashi a wuki, 3 ata ati: Tanyutshelaki kete kolo, kuyanga ashi a wuki, kuyanga etamba, edja ndu lam'ayutdjya ekambi a Unyashungu asu tulimbitelu lu fumu yawo. 4 Dimi lakuki okone aki efula ka wane wakadjama tulimbitelu. Wane wakadjama tulimbitelu waki nunu lukama la akumi anei la nei uma lu wauhu tshe w'asi Isariyele: 5 Uma lu diuhu dia Juda, wakadjio antu nunu dikumi la pendi tulimbitelu; uma lu diuhu dia Rubena, nunu dikumi la pendi; uma lu diuhu dia Ngada, nunu dikumi la pendi; 6 uma lu

diuhu dia Ashere, nunu dikumi la pendi; uma lu diuhu dia Nafetali, nunu dikumi la pendi; uma lu diuhu dia Manase, nunu dikumi la pendi; 7 uma lu diuhu dia Simeyona, nunu dikumi la pendi; uma lu diuhu dia Lewi, nunu dikumi la pendi; uma lu diuhu dia Isakara, nunu dikumi la pendi; 8 uma lu diuhu dia Zebuluna, nunu dikumi la pendi; uma lu diuhu dia Josefu, nunu dikumi la pendi; uma lu diuhu dia Bendjamina, nunu dikumi la pendi, wakadjama tulimbitelu.

Ului w'Antu Waheyama Mbala la Ntundu ka Kiti ka Diulelu

9 L'okongo w'akambu aso, dimi lakendi, lakenyi ului a wuki w'antu waheyama mbala, uma lu wedja tshe, ndu uma lu wauhu tshe ndu uma lu weuhu w'antu tshe, ndu w'eteketa tshe, wemadi la ntundu ka kiti ka diulelu ka Ona-Okoko, wolotshi ahondo a wema, la wanga w'atuku l'anya awo. 10 Ku vo wakahangohango la diui dia wulu vati: Panda keko ka Unyashungu asu, latudjaseka lu kiti ka diulelu, ndu ka Ona-Okoko! 11 Ndu andjelo tshe wakemadi, wudingi kiti ka diulelu ndu dikumanyi la nyama sho nyei. Vo wakakhusama la ntundu ka kiti ka diulelu watermola Unyashungu, 12 wata vati: Ayali osoku! Otshoko, la lutumbu, la yimba, la lusaka, la kenemo la wulu, la diulelu, wayali le Unyashungu asu pundju pundju! Ayali osoku!

13 Ekumanyi kemotshi akankaluya diui ati: Wane wolotshi ahondo a wema, wa na wewo? uma lendi uyewo? 14 Dimi lakawutela nti: Khumadiondjo, weme keya. Ndi akamvutela ati: Vo weli wane wambuya uma lu pa ka wuki, wakotsha ahondo awo, wakawaedia la dikila dia Ona-Okoko. 15 Diako mbemadiwo la ntundu Ka kiti ka diulelu ka Unyashungu. Vo watukambelaka ulimu ndu la yanyi Ndu l'utshu lu etemwelo kandi. One ludjashi lu kiti ka diulelu, Ayuwakumba la eyalelu kandi. 16 Vo hawuka ndjala ntu, hawuka pusa ntu; Yanyi ya wulu hayâhetela, Kuyanga edungu ka wulu. 17 Ne dia Ona-Okoko leli lu kiti ka diulelu, Ayuyala ulami awo, Ayâlombola utsua la teko di'ashi a lumu. Unyashungu ayâkitula asoi tshe uma lu ashu awo.

Djimbitelu y'Esambeli

8 Lam'akadidihula Ona-Okoko djimbitelu y'esambeli, ki kakayala l'ulungu etenyi ka ushidi a tangu. 2 Dimi lakenyi andjelo esambeli watermalaka la ntundu ka Unyashungu; wakashasha punji esambeli.

3 Ku ondjelo ukina akayi, akemala l'ediakelu, aki la donga dia paunyi dia dja. Wakawusha tsho efula ya ndi nsanganya la dombelo di'ekilami tshe ladiku di'ediakelu ka paunyi kaki la ntundu ka kiti ka diulelu. 4 Dinga dia tsho la dombelo di'ekilami wakambela la ntundu ka Unyashungu uma lu lunya la ondjelo. 5 Ku ondjelo akose donga diako dia dja, akadiludia la dja y'uma l'ediakelu, akadihumanya la kete. Ku dikhungula ndu aui, ndu angadimu wa ndjadi, ndu edidimelu ka kete wakayala l'olongo.

6 Andjelo ako esambeli waki la pungi esambeli, wakayalongsola dia mvuda.

Ondjelo a Ntundu Ambuda Pungi

7 Ondjelo a ntundu akadi, ku mboko ya mvula la dja yosohanyi la dikila yakalo la kete. Etenyi ka satu ka kete kakalungula, ndu etenyi ka satu k'etamba kakalungula, ndu adiyu w'eyuyu tshe wakalungula.

Ndu wa Hendi

8 Ondjelo a hendi akadi, ku engo uku ukungu a wuki, kakahetaka dja, kakatambiyama lu ashi a wuki. Etenyi ka satu k'ashi a wuki kakahilo dikila. 9 Etenyi ka satu ka diango tshe diaki la lumu lu ashi a wuki, kakavu; ndu etenyi ka satu ka watu kakalanyema.

Ndu wa Satu

10 Ondjelo a satu akadi, ku yoto ya wuki ya dja, yakahetaka uku uwa, yakako uma l'ulungu ladiku dia etenyi ka satu k'etundu w'ashi, ndu lu teko di'ashi. 11 Lukumbu la yoto sho leko Ululu. Etenyi ka satu k'ashi kakayala ululu. Antu efula wakavu ne dia ashi wakayala ululu.

Ndu wa Nei

12 Ondjelo a nei akadi, ku etenyi ka satu ka unya, ndu etenyi ka satu ka ngondo, ndu etenyi ka satu ka toto wakakomama, ne dia etenyi kawo ka satu kayali udjima, ndu yanyi tahetaki etenyi ka satu, ndu utshu pupu.

13 Dimi lakenyi, lakuki pungu kemotshi kafumbo l'ulungu, ata la diui dia wulu ati: Fono, fono, fono le wa la kete, ne dia aui akina wa pungi wa andjelo asatu wayanga mvuda!

Ndu wa Tanu

9 Ondjelo a tanu akadi, ku dimi lakenyi yoto y'uma l'ulungu yayako la kete.

Wakawusha sapi ka difuku diaha la ekumelu. 2 Ndi akadihula lukuki la difuku so diaha la ekumelu, ku edinga wakatumbi uma lu difuku uku edinga w'uma lu khuka ka wuki. Unya la loheledi wakafulema la edinga w'uma lu difuku diako. 3 Endjo wakatumbi uma l'edinga ako; wakawasha wulu uku wa kutu ya la kete, kuyanga engo k'uyuyu, kuyanga utamba, paka antu waha la djimbitel ya Unyashungu lu fumu yawo. 5 Vo kunungula wulu wa mbadiaka, paka wa mbasuya ngondo tshanu. Sui diawo diaki uku sui dia kutu lam'alumatato untu. 6 Lu nshi sho, antu wayuyanga nyoi, keli vo hawukitana; wayuyanga mvo, ku nyoi ayâlawo.

7 Etundu w'endjo waki uku falasa yambolongoswama dia ndo ta. Lu ete awo kaki alembu wa kusu uku paunyi; dundji diawo diaki uku dundji dia antu. 8 Vo waki la divu uku dia amantu; anyu awo waki uku wa tambwe. 9 Waki la eloto wa ta lu tulu uku eloto wa mbulu. Luhelu l'ahafu awo laki uku luhelu la pusupusu ya ta, ndu la falasa efula lam'atawatshu utsha lu ta. 10 Vo waki la wela uku wanga wa kutu; waki la wulu lu wela awo dia nsuya antu ngondo tshanu. 11 Ondjelo a difuku diaha la ekumelu kaki khum'ekanga kawo. Lukumbu landi l'oteketa w'asi Heberu leli Abadona, keli l'oteketa w'asi Ngirika leli Apolionya (kitshimudi ati: Unanyishi).

12 Fono ka ntundu kambeta. Enda, fono kina hyendi yayayi l'okongo.

Ondjelo a Samalu Ambuda Pungi

13 Ondjelo a samalu akadi, ku dimi lakuki diui di'uma lu seki nyei y'ediakelu ka paunyi keli la ntundu ka Unyashungu, 14 diatela ondjelo a samalu laki la pungi ati: Ukelekuli andjelo ane wukelekami l'umamu a ndjali ka wuki ka Eyufarate. 15 Okone andjelo ako anei wakakelekwama, wakalongsowama dia ushidi uku la lushi luku, la ngondo keku, la eleku keku, dia ndjaka etenyi ka satu k'antu. 16 Elui w'alimbi wakahemi ladiku dia falasa waki nunu akumi ahendi tena nunu dikumi. Dimi lakuki uku aki efula kawo. 17 L'eneulo kakamenyi falasa la wane wakayahemi, vo waki la eloto lu tulu uku dja, la uku ave w'edima ndu uku mboko ya dja. Ete wa falasa waki uku ete wa tambwe; dja la edinga wa tsho wakatumbi uma l'enyo awo. 18 Etenyi ka satu k'antu kakiadiakema la asui asatu ane: dja, edinga, la mboko ya dja wakatumbaka uma l'enyo awo.

19 Ne dia wulu wa falasa sho eko lu enyo ayo ndu lu wela ayo. Wela ayo waki uku elui, ndu waki la ete; la wo mbakawasuyaka antu.

20 Antu akina waki kundjakema la asui aso asatu, kunkadimula etema uma l'elimu w'anya awo. Vo kunkimo ntemola ediengé, ndu dikishi dia paunyi, ndu dia fesa, ndu di'ehotela, ndu dia ave, ndu di'etamba, wane waheyi mena kuyanga mbuka, kuyanga nkendakenda. 21 Vo kunkadimula etema uma lu diakanelu diawo kuyanga uma l'ekanga awo, kuyanga uma lu munanyi la evi awo.

Ondjelo Ambuya la Wombo wa Buku w'Ululu

10 Dimi lakenyi ondjelo ukina a wulu ayahulo uma l'ulungu, olotshi dindi. Ndi aki la ngulu l'ote andi; elundji kandi kaki uku unya; ekulu andi waki uku dikundju dia dja. 2 Ndi aki la wombó wa buku wa tshitshé wufulwami lu lunya landi. Ndi akahe lukulu landi la pami ladiku dia ashi a wuki, la lukulu la lomoso la kete. 3 Ndi akahangohango wulu uku atudikitaka tambwe. Lam'akandahangohango, akhungula esambeli wakakhungula. 4 Lam'akakhungula akhungula esambeli ako, dimi lakayangi nfunda. Ku dimi lakuki diui uma l'ulungu diata ati: Ufule akambu aku wakati akhungula esambeli, tuwafundaki. 5 Ondjelo wakamenyi emadi l'ashi a wuki la lu kete, akedia lunya landi la pami utsha l'ulungu. 6 Ndi akatshibi lu lukumbu la one leli la lumu pundju pundju, lakatungi ulungu la diango dieli loko, ndu kete la diango dieli loko, ndu ashi a wuki la diango dieli loko, ati: Etena hayala ntu, 7 keli lu nshi ya diui dia ondjelo w'esambeli, lam'akandayangi mvuda, ku akambu wa Unyashungu wushami wakashili, ku lukumu l'ololo lakandatela ekambi andi amvutshi.

8 Diui diakamuki uma l'ulungu, lakadiuki ntu diamvutela ati: Tshoka, utose wombo wa buku wufulwami lu lunya la ondjelo wemadi ladiku di'ashi a wuki la dia kete. 9 Ku dimi lakatshu utsha le ondjelo, lakawutela nti: Umbisha wombo wa buku ako wa tshitshe. Ndi akamvutela ati: Uwose, ûli. Vo wayuyala ululu lu dikundju diaye, keli vo wayuyala mpe l'unyo aye uku usanga. 10 Ku dimi lakose wombo wa buku wa tshitshe uma lu lunya la ondjelo ako, lakûli. Vo waki mpe uku usanga l'unyo ami. Lam'akamûli, dikundju diami diakayala ululu. 11 Ku vo wakamvutela vati: Dieli la ye dia mvuta dikambu di'antu efula, ndu dia wedja, ndu

di'eteketa, ndu dia khumi ya dikanga.

Akambu Wayuyala l'Usumba la lu Etemwelo; "Emenyi Ehendi"

11 Vo wakambisha lokombe laki uku danga. Omotshi akamvutela ati: Unela, ediki etemwelo ka Unyashungu, ndu ediakelu; ali wane watemola loko. 2 Utshiki seke dieli l'andja w'etemwelo, tudiedikaki, ne dia wakadisha wedja. Vo wayukamela usumba w'ekila la tshina di'ekulu ngondo akumi anei la hyendi. 3 Dimi layusha emenyi ami ehendi wulu wa mvuta diui nshi kinunu la kama hyendi la akumi asamalu, wolotshi akuniya.

4 Wane weko eweli ehendi, la dikitshelu pendi di'atala, mbemadi la ntundu ka Khumadiondjo ka kete. 5 Naka untu ayulanga mbatshela kolo, dja yayutumba uma l'enyo awo, yayutshumba atunyi awo. Naka untu ayulanga mbatshela kolo, dieli la ndi dia ndjakema osoku. 6 Wane weko la wulu wa ndjiha ulungu, ne dia mvula talokaki lu nshi yatelawo antu diui, vo mbeli la wulu wa mpilula ashi dikila, ndu wa nanya wa la kete la asui tena efula uku alangawo. 7 Lam'ayuwushidiya mvuta diui diawo, nyama katutumbaka uma lu difuku diaha la ekumelu ayuwalosha ta, ayâleka wulu, ayâdiaka. 8 Edu awo wayukalema l'osese w'usumba a wuki, wetawo l'etema vati: Sodoma la Edjibitu, lene akawadiaki Khumadiondjo l'utamba a mpeketanya. 9 Uma lu weuhu w'antu ndu wa wauhu, ndu wa eteketa, ndu wa wedja wayendaka edu awo nshi shatu l'etenyi, hawetawo edu awo nkhundama lu waumbu. 10 Wa la kete wayongenangena dikambu diawo, wayokenya; wayutumanelu eshasha, ne dia amvutshi aki ahendi wakasuyaka wa la kete. 11 L'okongo a nshi shatu sho la etenyi, nyuma ka lumu uma le Unyashungu kakoto l'etema awo, ku vo wakemala l'ekulu awo. Woma wa mamba akandi wane wakawaendaka. 12 Vo wakuki diui dia wuki uma l'ulungu diawatela ati: Nyumbeli lindu! Ku vo wakambela l'ulungu lu dindi. Atunyi awo wakawaenyi. 13 L'ushidi oso, kete yakadidima wulu, ku etenyi ka dikumi k'usumba ako akanyuko. Antu nunu esambeli wakavu lam'akadidima kete. Wane wakatshikala, wakuki woma, wakatumbula Unyashungu a l'ulungu.

14 Fono ka hendi kakashili. Enda, fono ka satu kayuya esadi.

Ondjelo w'Esambeli Ambuda Pungi

15 Ondjelo w'esambeli akadi; ku aui wa wulu wakukema l'ulungu, wakati vati: Diulelu dia la kete nye diambuyala dia Khumesu, la dia Kristu kandi. Ndi ayulela pundju pundju. 16 Ku dikumanyi akumi ahendi la nei, watudjaseka la ntundu ka Unyashungu lu kiti yawo ya diulelu, wakakhusama, wakatemola Unyashungu, 17 wata vati: Shu tambuka lusaka, we Khumadiondjo Unyashungu Kanga-Wulu-Tshe, leko ndu lakiko; Ne dia we akose wulu aye wa mamba, ku akatatela mbulela. 18 Wedja ekina wakuki kele, ku kele kaye kakayi, Ndu lushi la numbuya wane wakavu, Ndu lushi la nfuta ekambi aye amvutshi ndu ekilami, Ndu wane watukaka lukumbu laye woma, Wa tshitshe ndu wa waki; Ndu dia nanya wane watulanyaka kete.

19 Etemwelo ka Unyashungu a lumu l'ulungu kakadihwama, ku oshetu a sheki yandi akenama lu etemwelo kandi. Angadimu wa ndjadi, ndu aui w'antu, ndu akhungula, ndu edidimelu ka kete, ndu mboko efula ya mvula wakayeli akambu aksu.

Umuntu la Ului a Wuki, la Ana

12 Djimbitelu ya wuki yakenama l'ulungu. Umuntu akalote unya; ngondo kaki la tshina di'ekulu andi; dembo dia kusu diaki la toto dikumi la tuhendi diaki l'ote andi. 2 Ndi aki la diemi. Ndi akawana, akatatela lono l'eutelu. 3 Ku djimbitelu kina yakenama l'ulungu, menyi ku ului a wuki wa tilili one, waki la ete esambeli la seki dikumi, la alembu wa kusu esambeli l'ete awo. 4 Wela awo akakutula etenyi ka satu ka toto ta l'ulungu, akatokosha la kete. Ului ako akemala la ntundu ka umuntu lakayangi mbuta; akalungamela ati: Kandi on'andi lam'yanduwuta. 5 Ku ndi akuti ona pamii, diaki la ndi dia mbulela wedja tshe l'ukalimba a luwulu. On'andi akosama utsha le Unyashungu lu kiti kandi ka diulelu. 6 Ku umuntu ako akalawo l'usui, lene akalongosola Unyashungu dihuli, dia vo mbusha mbu ya nde nshi kinunu la kama hyendi la akumi asamalu.

Ta l'Ulungu

7 Ta diaki l'ulungu. Mikaele la andjelo andi wakatshu dia ntolosha ului ako ta. Ului ako la andjelo andi wakalo ta. 8 Keli vo kumbaleka wulu; vo kuntana dihuli ntu l'ulungu. 9 Wakakadja ului ako a wuki w'edjeda, wetawo vati: Uhimbanyi, Satana, ukeshi a wa la kete tshe — wakawukadja la

kete ndi la andjelo andi. 10 Ku dimi lakuki diui dia wulu l'ulungu diata ati:

Kakiane panda kambuyala ndu wulu, ndu diulelu dia Unyashungu, ndu luwandji la Kristu kandi, ne dia osongwedi wa anyasu ambukadjema, one latâsongwelaka la ntundu ka Unyashungu ndu la yanyi ndu l'utshu. 11 Vo wakuleki wulu ne dia dikila dia Ona-Okoko, ndu dia diui dia wo. Vo kumbuka nyumu yawo ngandji edja ndu lu nyoi. 12 Ulungu ongenengene, ndu wane watudjaseka loko. Fono kayayala la kete ndu l'ashi a wuki, ne dia uhimbanyi akayi le nyu. Ndi eko la kele ka wuki; ndi mbeyaka ati: Etena kami kambusukana.

Ta Diambuyala Ntu la Kete

13 Lam'akenyi ului oso a wuki ati: Dimi lambukadjema utsha la kete, ku ndi akasuya umuntu lakuti ona pamii aksu. 14 Wakasha umuntu ahafu ahendi wa pungu ka wuki dia ndi nfumbo utsha l'usui, lene aki dihuli diandi, lene atundulungulaka mbu ya nde etena kemotshi, ndu tena dimotshi, ndu etenyi ka hendi k'etena. 15 Ului a wuki akahongola ashi uku ndjali ka wuki l'okongo a umuntu, dia ashi aksu mbokeloya. 16 Kete yakakimanya umuntu; yo yakase unyo, yakamene ndjali ka wuki kakahongola ului a wuki uma l'unyo awo. 17 Ku ului akuki umuntu kele, akatshu dia ntolosha an'andi wakatshikala ta, wane watukitanyiaka elembe wa Unyashungu, watulamaka diui dia Jesu.

Nyama Kayatumbi Uma l'Ashi

13 Ndi akemala lu lokongo l'ashi a wuki. Ku dimi lakenyi nyama kayatumbi uma l'ashi a wuki, kaki la seki dikumi la ete esambeli; ndu ladiku dia seki yawo, alembu a kusu dikumi, ndu l'ete awo, kumbu ya lotengo. 2 Nyama kakamenyi, kaki uku koi; ekulu ato waki uku wa mbulu, unyo ato waki uku wa tambwe. Ului ako a wuki akawusha wulu awo, la kiti kawo ka diulelu, la diulelu efula. 3 Ku dimi lakenyi ote awo omotshi, wakakotama puta ka nyoi. Puta keso ka nyoi kakakono. Wa la kete tshe wakambi ne dia nyama kako. 4 Antu wakatemola ului, ne dia vo wakasha nyama kako wulu. Ku vo wakatemola nyama, wakati vati: Akona eli uku nyama kene? Eya ndo la to na?

5 Wakasha nyama unyo wa to nsema la ntenga Unyashungu, ndu wulu wa to ntshikala ngondo akumi aenei la hyendi. 6 Ku to kakafula unyo ato atenga Unyashungu, ndu lukumbu landi, ndu

ENYELO

edjaselu kandi, ndu wane wudjashi l'ulungu. 7 Wakawusha wulu wa ndosha ekilami ta, ndu wa mbâlembia. Wakawusha wulu wa mbulelu wauhu tshe ndu antu tshe ndu eteketa tshe ndu wedja tshe. 8 Ku wa la kete tshe waha la kumbu yawo yufundami lu buku dia lumu dia Ona-Okoko, lakadiakema l'etatelu ka kete, wayotemola nyama kako. 9 Naka untu eko la tui, ndi uki. 10 Naka untu eko la dia mundama lu fumbi, Dieli la ndi dia ntsho lu fumbi. Naka untu ambudiaka untu la yombo, Dieli la ndi dia ndjakema la yombo. Dikambu so mbeli leta l'etetemalu la mabetawo ka ekilami.

Nyama Kayatumbi Uma la Kete

11 Dimi lakenyi nyama kekina kayatumbi uma lu kete. To kaki la seki hyendi uku Ona-Okoko, kakateketa uku ului a wuki. 12 To kaki la wulu tshe wa nyama ka ntundu lu ashu ato. To kambete kete tshe ndu wane watudjaseka loko, dia vo ntemola nyama kako ka ntundu, kene kaki la puta ka nyoi kakakono. 13 To katutshaka tulimbitelu ta mamba efula, ne dia mpuluya dja uma l'ulungu uya la kete lu ashu w'antu. 14 To katukesaka wa la kete ne dia tulimbitelu takawawusha dia ntsha lu ashu wa nyama kako, atela wa la kete ati: Nyutshi efanelu ka nyama kako, kaki la puta ka yombo, keli kakatshikal la lumu. 15 Wakawusha wulu wa mbidja lumu l'efanelu ka nyama kako, ne dia efanelu ka nyama kako kakete, ndu ne dia ndjakia antu tshe wahatemola efanelu ka nyama kako. 16 Ndi akadji olemebe dia antu tshe, ndu wa tshitshe ndu wa waki, ndu akanga w'engonyi, ndu akanga a weula, ndu wane wuyadjasedi ndu fumbi dia vo nungula untu l'untu djimbitelu lu lunya landi la pami, kana lu fumu kandi; 17 la dia untu teyaki nsumba kana nsundja, paka one leli la djimbitelu ku ya lukumbu la nyama kako kana numero ka lukumbu lato. 18 Yimba nye. One leli la yimba, ali numero ka nyama kako, ne dia to keli numero k'untu omotshi. Numero kato keko kama shamalu la akumi asamalu la asamalu.

Ona-Okoko l'Ukungu a Siona

14 Dimi lakendi, menyi ku Ona-Okoko emadi l'Ukungu a Siona, ndu antu nunu lukama la akumi anei la nei waki la lukumbu landi, la lukumbu la Shi lufundami lu fumu yawo. 2 Ku dimi lakuki diui uma l'ulungu, uku dihelela di'ashi efula, ndu uku diui dia dikhungula la dia wulu. Diui

diakamuki diaki uku diui dia ampumi a sese wahuma sese yawo. 3 Vo wakimbi usambu w'uyuyu la ntundu ka kitu ka diulelu, ndu ka nyama nyei, ndu ka dikumanyi. Nduku untu lakeyi mimba usambu aks, paka antu nunu lukama la akumi anei la nei, wane wakatshungwama uma la kete. 4 Vo kumunana la amantu, ne dia vo weko uku amantu wa dimuma. Vo mbatuyelaka Ona-Okoko lu ahuli tshe watshondi. Vo wakasumbama uma l'atei w'antu, ne dia ndjala elua wa ntundu le Unyashungu ndu le Ona-Okoko. 5 Vo kuntana kashi l'enyo awo, ne dia vo kema la kolo.

Aui Uma l'Ulungu

6 Dimi lakenyi ondjelo ukina afumbo l'ulungu, aki la lukumu l'ololo la pundju, lakandatelaka wa la kete, ndu wedja tshe ndu wauhu tshe ndu eteketa tshe, ndu antu tshe. 7 Ndi akati la diui dia wulu ati: Nyuki Unyashungu woma, nyûtumbuli, ne dia unya andi w'elumbwelu ambukuka. Nyotemole one lakatungi ulungu la kete la ashi a wuki la tekodi'ashi.

8 Ondjelo ukina a hendi, akuyeli, ata ati: Babilona ka wuki kambunyuko, kambunyuko, kene kakanoshaka waulelu tshe wanu wa kele k'akambu wa munanyi yato!

9 Ku ondjelo ukina a satu akâyeli ata la diui dia wulu ati: Naka untu ayotemola nyama kako la efanelu kato, ndu ayulungula djimbitelu lu fumu kana lu lunya landi, 10 ndi ayono ndu wanu wa kele ka Unyashungu, wakawalongosola lu dikoho dia kele kandi aha la diango dikina. Ndi ayusuyama la dja ya tsho la ntundu ka andjelo w'ekila ndu la ntundu ka Ona-Okoko. 11 Dinga dia fono kawo diatumbelaka pundju pundju. Wane watotemolaka nyama kako ndu efanelu kato, ndu wakose djimbitelu ya lukumbu lato, vo kema la mumuya la yanyi ndu l'utshu.

12 Lan'eli etetemalu k'ekilami, wane watukitanyiaka elembe a Unyashungu la mabetawo ka Jesu.

"Wane Wavo le Khumadiondo Weko la Otshoko"

13 Dimi lakuki diui uma l'ulungu diata ati: Ufundji wati: Wane wavo le Khumadiondo weko la otshoko kakiane ndu pundju. Nyuma kata ati: Vo wayumuya uma l'elimu awo, ne dia etsha awo wambayela!

14 Dimi lakendi, menyi ku dingi dia wema; lakenyi untu lufanyi la on'a untu

udjashi lu dingi diako. Ndi aki la dembo dia kusu l'ote andi, la lukuwa la diesa lu lunya land. 15 Ondjelo ukina akatumbi uma l'etemwelo, ahangohang la diui dia wulu le one lakadjashi lu dingi ati: Utumi lukuwa laye, utuni diango, ne dia lushi la muna lambukuka! ne dia diango dia dinela dia kete diambela. 16 Ku one lakadjashi lu dingi akakadjala lukuwa landi utsha la kete, ku diango dia la kete diakanama.

Etuli ka Mamula ka Kele ka Unyashungu

17 Ondjelo ukina akatumbi uma l'etemwelo ka l'ulungu, ndu ndi kaki la lukuwa la diesa. 18 Ondjelo ukina akatumbi uma l'ediakelu, ndi kaki umbuledi wa dja. Ndi akahangohang la diui dia wulu le one laki la lukuwa ati: Utumi lukuwa laye la diesa, usanganya sandji di'elua w'ekodi wa wa la kete, ne dia elua andi wambela tshe. 19 Ku ondjelo akakadjala lukuwa landi la kete, akasanganya elua wa la kete, akawekadja lu etuli ka wuki ka mamula ka kele ka Unyashungu. 20 Wakamula diango lu etuli l'andja w'usumba, ku dikila diakatumbi uma loko, diakambela edja ndu lu molola weli l'ete wa falasa, edja ndu kilometere kama shatu la akumi ahendi.

Usambu w'Uyuyu wa Diandu

15 Dimi lakenyi djimbitelu kina ya wuki la ya mamba l'ulungu, andjelo esambeli wakembe asui esambeli. Asui aso weko wa ndjihelu, ne dia kele ka Unyashungu kambushila.

2 Dimi lakenyi uku ashi a wuki wa talatala wosohanyi la dja; ndu wane watolembiaka nyama kako ndu efanelu kato, ndu numero ka lukumbu lato wemadi l'umamu w'ashi a wuki wa talatala, waki la sese ya Unyashungu. 3 Vo wakimbi usambu a Mose, ukambi a Unyashungu, ndu usambu wa Ona-Okoko, wata vati: Khumadiondjo Unyashungu, Kanga-Wulu-Tshe, Ndi etsha aye waki ndu mamba li! We Khum'ekanga ka wedja tshe, Mbuka yaye yeko ololo la mete! 4 Khumadiondjo, akona hukuka woma, Ndu ahutumbula lukumbu laye na? Ne dia weme utu keli ekila. Wedja tshe wayuya, wayukotemola, Ne dia etsha aye w'ololo wambenama.

Akoho Esambeli wa Kele ka Unyashungu

5 L'okongo w'akambu aso, dimi lakenyi lam'akawadilhula etemwelo ka luudu la dipema l'omenyi l'ulungu, 6 andjelo ako

esambeli wakatumbi uma l'etemwelo wayembe asui esambeli, wolotshi ahondo wa linene l'ololo wa ngaingai, ndu eya wa paunyi lu tulu yawo. 7 Nyama kemotshi uma l'atei a nyama nyei kakasha andjelo esambeli akoho esambeli wa paunyi wuludi too la kele ka Unyashungu, keli la lumu la pundju pundju. 8 Etemwelo kakaluli too l'edinga wa lutumbu la Unyashungu, ndu uma lu wulu andi. Nduku untu akeyi mboto l'etemwelo, edja ndu asui esambeli wa andjelo esambeli wambushila.

Etumelu k'Andjelo

16 Dimi lakuki diui dia wulu uma l'etemwelo, diakatela andjelo esambeli ati: Nyutshu, nyututshululi akoho esambeli wa kele ka Unyashungu utsha la kete.

Wambutshulula Kene Kaki lu Dikoho Dia Kele la Kete

2 Ondjelo a ntundu akatshu, akatshulula kene kaki lu dikoho diandi utsha la kete. To kakayala puta ya waki ya kolo le antu waki la djimbitelu ya nyama ndu wakatemolaka efanelu kato.

Ndu lu Ashi a Wuki

3 Ondjelo a hendi akatshulula kene kaki lu dikoho diandi lu ashi a wuki. Ashi wakayala uku dikila di'udu; ku diango tshe dia lumu dia lu ashi diakavu.

Ndu lu Kushi

4 Ondjelo a satu akatshula kene kaki lu dikoho diandi lu kushi ndu lu teko di'ashi. Ashi ako wakahilo dikila. 5 Ku dimi lakuki ondjelo w'ashi ati ati: We keli ololo, keko, kakiko, we l'Ekila, Ne dia we akalumbula okone! 6 Ne dia vo wakatshulula dikila dia Ekilami ndu dia amvutshi, We akawasha dikila dia vo no. Vo mbukuki dino! 7 Ku dimi lakuki ediakelu kata ati: Elu, Khumadiondjo, Unyashungu, Kanga-Wulu-Tshe, Dumbwelu diaye dieko mete la ololo!

Ndu lu Unya

8 Ondjelo a nei akatshulula kene kaki lu dikoho diandi lu unya, wakawusha wulu wa ntshumba antu dja. 9 Antu wakatshumbama lu luhaladi la wulu, wakatenge lukumbu la Unyashungu leli la wulu ladiku dia asui ako. Vo kunkadimula etema dia mbutumbula.

Ndu lu Kiti ka Diulelu ka Nyama

10 Ondjelo a tanu akatshulula kene kaki lu dikoho diandi lu kitika diulelu ka nyama.

Diulelu diato diakayala udjima. Vo wakatome nimi yawo ne dia kandji, 11 wakatenge Unyashungu a l'ulungu, ne dia kandji yawo ndu dia puta yawo. Vo kunkadimula etema dia etsha awo.

Ndu lu Eyufarate

12 Ondjelo a samalu akatshulula kene kaki lu dikoho diandi lu ndjali ka wuki ka Eyufarate; ashi wa loko wakumi, ne dia nongoswela khumi ya dikanga yatuyakaka uma l'ehutwelu ka unya mbuka. 13 Ku dimi lakenyi nyuma shatu yufanyi la dipuli, yatumba uma l'unyo w'ului a wuki, ndu uma l'unyo a nyama, ndu uma l'unyo w'umvutshi a kashi. 14 Yo yaki nyuma ya edienge yatutshaka tulimbitelu yatutshokaka le khumi ya dianga ya kete tshe, ne dia mbasanganya dia ndosha lushi la wuki la Unyashungu, Kanga-Wulu-Tshe, ta. 15 (Nyulungi, dimi layuya uku atuyakaka ubi. Untu lasena, latulamaka ahondo andi, ne dia atukokendakenda utakataka, ne dia watukena sonyi kandi, eko la otshoko!) 16 Wakásanganya lu dihuli dietawo l'oteketa w'asi Heberu vati: Aramangedona.

Ndu lu Loheledi

17 Ondjelo w'esambeli akatshulula kene kaki lu dikoho diandi lu loheledi. Ku diui dia wulu diakatumbi uma l'etemwelo, uma lu kiti ka diulelu diakati ati: Ambutshama! 18 Angadimu wa ndjadi, ndu aui w'antu, ndu akhungula wakayala. Kete yakadidima wulu; yo kundjidima efula la wulu osoku lam'aki antu la kete. 19 Usumba ako a wuki wakatana beke satu, ku esumba wa wedja ekina wakanyuko. Unyashungu akuho Babilona ka wuki, dia ndi imbonosha dikoho dia wanu la dia wulu la kele kandi. 20 Ndu asenga tshe wakamo, ndu ekungu komenama. 21 Ndu mboko ya waki ya mvula, yakakwela antu uma l'ulungu. Wutshu a lowoko otoi laki wutshu uku talata otoi. Antu wakatenge Unyashungu ne dia fono ka mboko ya mvula, ne dia fono kayo kakaleki wulu.

Elumbwelu ka Babilona

17 Ondjelo omotshi uma l'atei w'andjelo esambeli waifi la akoho akayi; akayumvutela ati: Uyi lindu keli ndjukunya elumbwelu ka umuntu kanga munanyi efula, ludjashi ladiku dia ashi efula. 2 Khumi ya dikanga ya la kete wakunana la ndi, ku wa la kete wakadjo la ndi wanu wa luseka. 3 Ndi akantole lu Nyuma l'usui omotshi. Dimi lakenyi umuntu ahemi ladiku dia nyama

ka tilili, kaki la ete esambeli la seki dikumi, yuludi la kumbu ya ntenga Unyashungu. 4 Umuntu oso akalote ahondo wa belaa la wa tilili, akalengama la diango dia paunyi la mboko y'ushinga a wulu la mboko y'akeso. Ndi aki la dikoho dia paunyi diuludi too la akambu wa ndjetete lu lunya landi, waki akambu wa mindu la wa luseka landi. 5 Ndi aki la lukumbu lufundami lu usheshe lu fumu kandi, ati: "Babilona ka Wuki, Nyangu Amantu wa Luseka la Akambu wa Ndjetete wa la Kete." 6 Dimi lakenyi umuntu ako ambudjo dikila dia ekilami, ndu dia emenyi wa Jesu.

Eshihudieli k'Akambu wa Umuntu la Nyama

Lam'akamawenyi, dimi lakambi efula. 7 Ku ondjelo akamumbula ati: Ambaye na? Dimi layukutela dikambu diushami dia umuntu one, ndu dia nyama katawembe l'okongo, keli la ete esambeli la seki dikumi. 8 Nyama kakayenyi kakiko, kemako. To kaya ka ntumba uma lu difuku diaha la ekumelu, dia to ntsho l'elanyelu. Wa la kete waha la kumbu yawo yufundami lu buku dia lumu umaka etatelu ka kete, wayamba lam'enawo nyama, uku akiko, la kemako, ndu kaya ka ndja. 9 Tukanyi ta kanga yimba tone. Ete esambeli welli ekungu esambeli wudjashi umuntu loko. 10 Ekungu ako welli khumi ya dikanga esambeli, atanu wambokokaka, ukina eko, ukina atayi. Lam'ayundaya, dieli la ndi dia ntshikala yema. 11 Nyama kako kakiko, kemako, keli uku khum'ekanga k'enanei, keli uma l'esambeli. To kayutsho l'elanyelu. 12 Seki dikumi yakayenyi, yeli khumi ya dikanga dikumi, wahatalungula diulelu. Keli yo yatutungulaka diulelu uku khumi ya dikanga kame la nyama ushidi otoi. 13 Vo welli la utema otoi, watukimoka wulu awo la diulelu diawo le nyama kako. 14 Vo wayolosha Ona-Okoko ta, ku Ona-Okoko ayálembia, ne dia ndi keli Khumi ka wakhumi, uku Khum'ekanga ka khumi ya dikanga. Ku wane welli la ndi, wane waketama ndu wakosama, ndu welli la kolamelu, wayálembia.

15 Ndi akamvutela ati: Ashi wakayenyi umuntu a luseka udjashi, welli uku wehu w'antu, la elui w'antu, la wedja, la eteketa. 16 Seki dikumi yakayenyi, ndu nyama, yayuhetsha umuntu a luseka. Yo yayúhandjula, yayútshika utakataka, yayole umunyi andi, yayútshumba ushiki. 17 Ne dia Unyashungu akotshiya dikambu ne l'etema awo dia vo ntsha uku lulangu landi,

la dia vo ndjala la utema otoi, la dia vo nkimwela nyama kako diulelu diawo, edja ndu lam'ayushidiyama aui wa Unyashungu. 18 Umuntu lakayenyi, eli usumba a wuki ako, wuledi khumi ya dikanga ya la kete.

Dianyelu Dia Babilona

18 L'okongo w'akambu aso, dimi lakenyi ondjelo ukina ayahulo uma l'ulungu aki la diulelu dia wuki. Ku kete yakahete la lutumbu landi. 2 Ndi akahangohango la diui dia wulu ati: Babilona ka wuki kambunyuko, kambunyuko! To kambuyala edjaselu k'ediengle, la ka djimu tshe dia kolo, Ndu ka fudu tshe ya kolo, ndu yahetshawo, 3 Ne dia wedja tshe wakalana Ne dia wanu wa kele ka munanyi kandi. Khumi ya dikanga tshe ya la kete wakunana la ndi. Ndu ambetshtshi w'ekanda wa la kete wakangone Uma lu wulu wa diango diandi efula. 4 Dimi lakuki diui dikina uma diata ati: Antu ami, nyutumbi uma l'atei ato, Nyutukuyoto lu kolo yato, Ndu nyutukulungula asui ato. 5 Ne dia kolo yato yambukuma pulu ndu l'ulungu, Ku Unyashungu akhu kolo yato. 6 Nyukitsheli uku akatatsheha akina, Wuleki tena pendu, uku welli etsha ato. Lu dikoho diakatasohanya diango, Nyukisohanya loko tena pendu. 7 Uku akandayatumbulu, ndu uku akandayaenya olo, Wawusha wuki wa asui la delu wuhu aka, Ne dia to kakati l'utema ato ati: Dimi lambudjase uku wadi a khum'ekanga. Dimi kema wadi aki udu; Dimi halena utanda edja ndu pundju. 8 Ne dia akambu aso, asui ato wayuya lushi otoi, Nyoi la utanda la ndjala ka kasha. To kayutshumbamba ushiki, Ne dia Khumadiondo Unyashungu lakinlumbuya eko la wulu.

9 Khumi ya dikanga ya kete wakunanaka la to, la wakenyi olo la to, wayukilela, wayuda tukuku lam'ayuwenna edinga wetshumbamelu kato. 10 Vo wayemala tshalula ne dia woma a fono kato, wayuta vati: Hai! hai! usumba a wuki wa Babilona, usumba a wulu! elumbwelu kaye kambuya l'ushidi otoi!

11 Ambetshtshi w'ukanda wa la kete wambuyilela, wambuyikumbula, ne dia nduku untu ukina lasumba diango diato ntu; 12 diango dia paunyi ndu dia fesa, ndu mboko y'ushinga a wulu, ndu mboko y'akesu ndu ahondo wa linene, ndu w'engingi, ndu wa ngedingededi, ndu wa tilili, ndu etamba wa tuino, ndu diango tshe di'ewanga diakawasele, ndu diango di'etamba di'ushinga a wulu diakawasele, ndu diango di'ehotela ndu dia mbulu, ndu dia ave wa awadi awadi; 13 kalafulu, ndu diango dia binyi, ndu mura, ndu iso ka nshinula, ndu

malashi, ndu wanu, ndu iso, ndu shima, ndu epunga, ndu ngombe, ndu ekoko; ndu falasa, ndu pusupusu ya ta, ndu fumbi, ndu nyumu y'antu. 14 Diango diakayakumbula diambumo uma le ye; Diango diaye di'amena tshe dia lukumu diambukushisho, Hadiutanema ntu pundju! 15 Ambetshtshi w'ekanda wa diango so, wakangonyama le to, wayemala tshalula, ne dia woma wa asui ato wakilela ndu wakikumbula, 16 wata vati: Hai! hai! usumba a wuki Waki uku untu lolotshishawo ahondo wa linene, w'engingi la wa tilili, Wolengami la diango dia paunyi La mboko y'ushinga a wulu la mboko y'akeso! 17 Ongonyi aka tshe akahadjwama l'ushidi otoi.

Akanga a watu tshe ndu wane watokendakenda lu watu ndu akanga a yenda, ndu ambetshtshi w'ukanda wa l'ashi a wuki, wakemala tshalula, 18 wakahangohango lam'akaweniyi ethshumbamelu kato wata vati: Usumba akona wufanyi la usumba a wuki one? 19 Vo wakayatela ditshu l'ete awo, wakahangohango walela la wakumbula la tukuku, wata vati: Hai! hai! usumba a wuki Wambuyalaka akanga a mashua tshe wa l'ashi a wuki engonyi dia wuki awo! Wambūhandjula l'ushidi otoi. 20 We, ulungu, ndu nyu ekilami, Ndu nyu atumami, ndu nyu amvutshi, Nyongenengene dia dikambu diawo! Ne dia Unyashungu ambūlumbula l'elumbwelu kanyu.

Djimbitelu Ati: Ayuhandjo Tshe

21 Ondjelo omotshi a wulu akose dive di'ohelo dia wuki, akaditambyia l'ashi a wuki ati ati: Wayuhandjula Babilona, usumba a wuki, Ku hawūtana ntu. 22 Hawuka diui dia apumi wa sese La dia amimbi w'esambu la dia amvudi wa tuhungi Ndu dia amvudi wa pungi l'atei aye ntu; Hawutana asedi a diango l'atei aye ntu; Hawuka lundju la dive di'ohelo l'atei aye ntu; 23 Ndu tala hadiuyoheta l'atei aye ntu; Hawuyuka diui dia utshuki a wadi Kuyanga dia umuntu lutshukami l'atei aye ntu, Ne dia ambetshtshi w'ukanda waki antu a waki wa la kete, Ne dia wedja tshe wakakesama l'ekanga aye. 24 Wakatanai dikila di'amvutshi la dia ekilami, La dia tshe wakadiakema la kete l'atei awo.

Usambu wa Diandu Uma l'Ulungu

19 L'okongo w'akambu aso, dimi lakuki uku diui dia ului a wuki w'antu l'ulungu wata vati: Nyanduli Latuyalaka! Panda la lutumbu, ndu wulu weko wa Unyashungu, 2 Ne dia dumbwelu diandi

ENYELO

dieko usimbwi la mete! Ndi akalumbuya umuntu kanga luseka la mamba, Lakalanya kete k'utundu la munanyi kandi. Ndi akosomboya dia dikila di'ekambi andi. 3 Vo wakati etena ka hendi vati: Nyanduli Latuyalaka! Dinga diato diambumbela pundju pundju. 4 Ku dikumanyi akumi ahendi la nei la nyama nyei wakakhusama, wakatemola Unyashungu ludjashi lu kiti ka diulelu, wata vati: Ayali osoku! Nyanduli Latuyalaka! 5 Ku diui diakatumbi uma la tshina dia kiti ka diulelu, diakati ati: Ekambi wa Unyashungu tshe, wane watuwukaka woma, Wa tshitshe ndu wa waki, wanduli Unyashungu! 6 Dimi lakuki uku diui dia ului a wuki w'antu, uku dihelela di'ashi efula, ndu uku akhungula a wulu, diata ati: Nyanduli Latuyalaka! ne dia Khumadiondjo Unyashungu, Kanga-Wulu-Tshe, ndi ambulela. 7 Tongenengene, tuyali la ongenongo utamanya; Ne dia diwala dia Ona-Okoko diambuyala, Wadendi akayalongosodi. 8 Wakasha umuntu dia ndi ndota Dihondo dia linene dia ngaingai la pesopeso — Dihondo diako dia linene dieli etsha w'ololo w'ekilami.

9 Ndi akamvutela ati: Ufundu wati: Wane waketama lu dambu dia tshuki dia Ona-Okoko, weko la otshoko. Ku ndi akamvutela ati: Aui wa mete wa Unyashungu ane. 10 Ku dimi lakukhusamela dia mbotemola. Ku ndi akamvutela ati: Tutshaki wuhu uku. Dimi leko unyaye ukambi ndu onanyo, la wane watukitanyiaka diui dia Jesu. Otemole Unyashungu, ne dia diui dia Jesu dieko nyuma y'au wa amvutshi.

Diui Dia Unyashungu Diambene

11 Dimi lakenyi ulungu ambudiho, menyi ku falasa ka wema kene! One lakakiahemi, aketama ati: Kanga Kolamelu la Mete; lu ololo andi mbatundulumbuyaka antu, mbatundolokaka la wo ta. 12 Ashu andi waki uku lumbi la dja; ndi aki la alemba wa kusu efula l'ote andi. Ndi aki la lukumbu lufundami lu dimba, layacyandi ndame utu. 13 Ndi akalote dihondo diakawamonge dikila. Lukumbu landi leli Diui dia Unyashungu. 14 Elui w'alimbi tshe wa l'ulungu wakuyeli l'okongo, wahemi falasa ya wema, wolotshi ahondo w'amena wa linene wa wema la uluwanyi. 15 Yombo ya diesa yakatumbi uma l'unyo andi, dia ndi yikota wedja. Ndi ayukamakamela diango dieli l'etuli ka kele ka wulu ka Unyashungu Kanga-Wulu-Tshe. 16 Ndi aki la lukumbu lufundami lu

dihondo diandi la lu ehelohelo kandi ati: "Khum'ekanga ka Khumi ya Dikanga ndu Khumi ka Wakhumi."

Wambeta Fudu lu Dambu

17 Dimi lakenyi ondjelo emadi lu unya. Ndi akahangohango la diui dia wulu le fudu tshe yafumbo l'ulungu ati: Nyuyi, nyusangani lu dambu dia wuki dia Unyashungu; 18 dia nyu ndjole emunyi wa khumi ya dikanga la wa elombodi w'alimbi, la w'akanga a wulu, la wa falasa la wane wuyahemi, ndu w'antu tshe, wuyadjasedi ndu wa fumbi, ndu wa antu wa tshitshe, ndu wa waki. 19 Dimi lakenyi nyama kako la khumi ya dikanga ya la kete ndu elui awo w'alimbi, wakasangana dia ndosha one lakahemi falasa, ndu elui andi w'alimbi. 20 Wakandi nyama kako, ndu umvutshi ato a kashi watutshaka tulimbitelu lu ashu ato, takandakesaka antu wakose djimbitelu ya nyama kako la wakatemola efanelu kato, wakawadji vo ahendi esenyu l'eduwa ka dja yaheta la mboko ya dja. 21 Wane wakatszikala, wakadiakema la yombo ya one lakahemi falasa. Yombo yako yakatumbi uma l'unyo andi, ku fudu tshe yakaluti emunyi awo.

Wambukeleka Satana

20 Dimi lakenyi ondjelo ayahulo uma l'ulungu aki la sapi ka lukuki la difuku diaha la ekumelu, la molola a wuki lu lunya landi. 2 Ndi akandi ului a wuki w'edjeda, eli Uhimbanyi, Satana ndame, akukeleka deku kinunu; 3 akawudji lu difuku diaha la ekumelu, akadihi lukuki, akakitsha djimbitelu loko, dia ndi takesaki wedja ntu, edja ndu lam'ayushila deku kinunu diako. L'okongo wa deku so, dieli la ndi dia ntshungwama yema.

Diulelu Dia Kristu la Ekilami Andi

4 Dimi lakenyi kitika diulelu, vo wakadjase loko, wakawasha wulu wa numbuya antu. Dimi lakenyi nyuma ya wane wakahimbwama ete ne dia diui dia Jesu ndu dia diui dia Unyashungu, wane waki kontemola nyama kako, kuyanga efanelu kato, waki kombosa djimbitelu yato lu fumu yawo ndu l'anya awo. Vo wakayala la lumu, ndu vo wakulela kame la Kristu deku kinunu. 5 Akina wakavu kundjala la lumu, edja ndu lam'akashili deku kinunu diako. Oso eli eulwelu ka ntundu k'uma lu nyoi. 6 Wane wakulo uma lu nyoi lu eulwelu ka ntundu, weko la otshoko ndu ekila! Nyoi ka hendi huyala wulu le wo, keli vo wayuyala elombedi wa Unyashungu la wa Kristu; vo wayulela kame la ndi deku kinunu.

Wambukimo Satana

7 Lam'ayushila deku kinunu diako, vo wayukimo Satana uma lu lukanu lene akindi. 8 Ndi ayutumba dia ndjukesa wedja wa l'atshuku anei wa kete, ayeta Ngongo la Mangongo dia mbasanganya, dia ndo ta. Vo tshe weko efula uku lokongo la l'umamu w'ashi a wuki. 9 Ku vo wakambela l'utundu a kete, wakadingi pangu k'ekilami, ndu usumba wakalangema. Dja yakahulo uma l'ulungu, yakâtshumbi. 10 Ku uhimbani lakâkesaka, akadajama l'eduwa ka dja, ndu mboko ya dja, lene aki nyama kako la umvutshi ako a kashi. Vo wayusuyama ndu yanyi ndu utshu pundju pundju.

Elumbwelu k'Ekumelu

11 Dimi lakenyi kiti ka wuki ka wema ka diulelu, ndu one lakadjashi loko; ulungu la kete wakamo uma lu ashu andi. Dihuli diawo kuntanema ntu. 12 Ku dimi lakenyi antu wakavu, wa waki ndu wa tshitshe, wemadi la ntundu ka kiti ka diulelu; wakafula abuku. Ku wakafula buku dikina, diaki buku dia lumu. Wakalumbuya antu wakavu uma l'akambu wakafundama lu abuku, uku waki etsha awo. 13 Ashi a waki wakatundja edu waki loko; ndu Nyoi la Udimu a Pengandu wakatundja edu waki loko. Wakalumbuya untu l'untu uku aki etsha andi. 14 Wakakadja Nyiola Udimu a Pengandu l'eduwa ka dja. Nyoi ka hendi kako keli eduwa ka dja! 15 Naka komena lukumbu l'untu lufundami lu buku dia lumu, keti wakawukadja l'eduwa ka dja.

Ulungu w'Uyuyu la Kete y'Uyuyu

21 Dimi lakenyi ulungu w'uyuyu la kete y'uyuyu; ne dia ulungu wa ntundu la kete ya ntundu wakadimana, kundjala ashi a wuki ntu. 2 Dimi lakenyi usumba w'ekila, Jerusalema y'uyuyu, wayahulo uma l'ulungu, uma le Unyashungu, wolongoswami uku utshukami wuyalengi dia ntsho le umendi. 3 Ku lakuki diui dia wulu uma lu kiti ka diulelu diata ati: Enda, edjaselu ka Unyashungu keko l'atei w'antu! Ndi ayudjase la wo, ku vo wayuyala antu andi. Unyashungu ndame ayuyala la wo, ndu ayuyala Unyashungu awo. 4 Ndi ayukitula asoi tshe lu ashu awo; nyoi hayuyala ntu, delu hadiuyuyala ntu, kuyanga ndjawi, kuyanga kandji. Akambu wa ntundu wambushila.

"Dimi Lambete Diango Tshe Eyuyu"

5 One lakadjashi lu kiti ka diulelu akati ati: Ulungi, dimi lambete diango tshe eyuyu.

Ndi akati ati: Ufundu, ne dia aui ako weli kolamelu la mete. 6 Ku ndi akamvutela ati: Akambu ako wambutshama! Alafa la Omenga mbemi, etatelu la ekumelu. One leli la pusa, dimi layetawo dia ndi no l'ushima w'ashi a lumu onono. 7 One layuleka akambu wa kolo wulu, ayusangula diango ne! Dimi layuyala Unyashungu andi, ku ndi ayuyala on'ami. 8 Keli akanga a woma, ndu waha la mbetawo, ndu wa kolo, ndu andjakanyi, ndu akanga a munanyi, ndu akanga w'aloka, ndu atemodi wa dikishi, ndu akanga a kashi tshe, sangu diawo diayuyala l'eduwa ka dja la mboko ya dja. Nyoi ka hendi keso.

Jerusalema y'Uyuyu

9 Ondjelo omotshi w'esambeli aki la akoho esambeli w'asui esambeli wa ndjihelu akayi. Ku ndi akamvutela ati: Yaka! dimi layukenya umuntu lutshukami le Ona-Okoko. 10 Ku ndi akantole lu Nyuma l'ukungu a wuki w'utali, akamenya usumba w'ekila, Jerusalema, wayahulo uma l'ulungu, uma le Unyashungu, 11 waki la lutumbu la Unyashungu, wakalingalinga uku dive dia awadi awadi, dia wema pesopeso uku talatala. 12 Vo waki la lukumbu la wuki ndu utali; waki la kuki dikumi la hyendi, la andjelo dikumi la ahendi wemadi lu asuku aco. Kumbu ya wauhu wa Isariyele dikumi la ahendi yakafundami loko. 13 Lu leke l'ehutwelu, kuki shatu; la ngel'a kushi, kuki shatu; la diku dia kushi, kuki shatu; lu leke l'edjelu, kuki shatu. 14 Lukumbu l'usumba laki la atshina dikumi la ahendi, ndu kumbu dikumi la hyendi ya atumami dikumi la ahendi wa Ona-Okoko yufundami loko.

15 One lakateketa la mi aki la yediko uku lokombe la paunyi dia mbedika usumba, ndu kuki yawo, ndu lukumbu lawo. 16 Beke di'usumba diaki nei, diedimi: utali awo aki uku wekeki awo. Ndi akedika usumba la lokombe, yediko yawo yaki kilometere nunu pendi la kama nyei. Utali la wekeki, la utali utsha l'ulungu waki pupu. 17 Ku ndi akedika lukumbu lawo: aboko akumi asatu la asamalu, uku weli yediko y'utali w'untu, ndu wa ondjelo. 18 Wakahiki peli dia lukumbu la ave wa awadi awadi; wakahiki usumba la paunyi tshu, uku talatala tshu. 19 Atshina wa peli dia lukumbu l'usumba wakasangema la wehu tshe w'ave w'ushinga a wulu. Tshina dia ntundu diaki la dive dia awadi awadi; dia hendi diaki udima; dia satu diaki ehemahema; dia nei diaki elesenese; 20 dia tanu diaki ebabelaba; dia samalu diaki tilili; di'esambeli diaki ekesekese; di'enanei,

ENYELO

diaki etukutuku; dia divwa diaki endondo; dia dikumi diaki esukusuku; dia dikumi la otoi diaki edimadima; dia dikumi la ahendi diaki engingi. 21 Kuki dikumi la hyendi yaki ya mboko y'akeso dikumi la hyendi. Lukuki la lukuki laki lowoko la dikeso Tutu. Osese w'usumba aki wa paunyi tshu, yufanyi la talatala keene wedi ukina.

22 Dimi komena etemwelo loko, ne dia Khumadiondjo Unyashungu Kang-Wulu-Tshe, la Ona-Okoko weko etemwelo kawo. 23 Usumba kumpumba unya kuyanga ngondo dia impeta loko, ne dia lutumbu la Unyashungu lakahete loko, Ona-Okoko eko tala diawo. 24 Wedja wayokendakenda l'usasi andi. Khumi ya dikanga ya la kete wayuya leko la lutumbu lawo. 25 Hawudiha kuki la yanyi — ne dia utshu huyala loko. 26 Wayuya loko la lutumbu la kenemo ka wedja. 27 Engo k'anyanya, kuyanga utshi w'akambu wa kolo, kuyanga kanga kashi, hoto loko! Keli paka wane wufundami lu buku dia lumu dia Ona-Okoko!

Ndjali ka Lumu; la Akatshi wa Nkonoya Wedja

22 Ndi akamenya ndjali k'ashi a lumu, a wema pesopeso uku talatala, watumba uma la tshina dia kiti ka diulelu ka Unyashungu la ka Ona-Okoko, 2 l'atei w'osese ato. La wedi a ndjali kaki utamba a lumu, wakatokaka wehu dikumi la ehendi w'elua. Vo wakatokaka elua la ngondo la ngondo: akatshi w'utamba waki dia nkonoya wedja. 3 Nduku mananu kayuyala leko. Kiti ka diulelu ka Unyashungu la ka Ona-Okoko kayuyala loko. Ekambi andi wayotemolaka. 4 Vo wayena elundji kandi. Lukumbu landi layuyala lu fumu yawo. 5 Huyala utshu leko. Vo hawuhumbi usasi wa tala kuyanga usasi wa una, ne dia Khumadiondjo Unyashungu kayuwahetela. Vo wayulela pundju pundju.

"Lakitanya Aui Weli lu Buku ne, Eko la Otshoko"

6 Ndi akamvutela ati: Aui ane weko wa kolamelu la wa mete. Khumadiondjo, Unyashungu a nyuma ya amvutshi, akatumi ondjelo andi dia menya ekambi andi akambu waya ka ndja. 7 Nyulungi, dimi layuya esadi.

One latulamaka aui w'akambu wahatayi wa lu buku ne eco la otshoko.

8 Dimi Joani kakuki, ndu kakenyi akambu aye. Ku lam'akamuki, la lam'akamenyi, dimi lakakhusama l'ekulu wa ondjelo wakamenya

akambu ako, dia mbôtemola. 9 Ku ndi akamvutela ati: Endi, tutshaki wuhu uku! Dimi leko ukambi uku we, ndu uku ananyo, amvutshi, ndu wane watulamaka aui wa lu buku ne. Otemole Unyashungu.

Diui Di'Eshilelu

10 Ndi akamvutela ati: Tufuleki aui w'amvutshi weli lu buku ne, ne dia etena kaya suki. 11 One leli kolo atshikali lu kolo kandi. Utshi w'akambu wa sonyi atshikali lu akambu andi wa sonyi. One leli ololo atshikali lu ololo andi. One leli l'ekila atshikali lu ekila kandi.

Etscha la Difutu Diawo

12 Nyulungi, dimi lundjayi esadi, 'leko lundjayi ndu la difutu diam i dia nfuta untu tshe, uku eli etsha andi. 13 Dimi leko Alafa la Omenga, la ntundu ndu la ndjihelu, etatelu ndu ekumelu.

14 Wane wakotsha ekutu awo, dia vo ndjala la wulu wa ndja l'utamba a lumu, la dia mboto lu asuku w'usumba weko la otshoko. 15 L'andja w'usumba keli fo, la akanga w'aloka, la amunanyi, la andjakanyi, la atmodeti wa dikishi, la one tshe latulangaka ndu latutaka kashi.

16 Dimi Jesu lakatumti ondjelo ami dia ndjunyutela akambu ane, dia nyu mvutela Ekelezia. Dimi leko lukuno ndu kanula ya Davidi, sunga yoto ya ngaingai ya pindju.

Diui Dia Mbewula Antu

17 Nyuma la Utshukami wambuta vati: Yaka! One luka ati ati: Yaka! One leli la pusa ayi! One lanlanga ose ashi a lumu wososa.

Diui Dia Mbewula Antu: "Taheki, Tahulaki!"

18 Dimi lambutela untu tshe luka aui w'akambu wahatayi weli lu buku ne nti: Naka untu ayahe aui akina ladiku dia aui ayo, Unyashungu ayuwahela asui wufundami lu buku ne; 19 ndu naka untu ayunya aui w'akambu wahatayi wufundami lu buku ne, Unyashungu ayuwunyiya etenyi kandi uma l'utamba a lumu, ndu uma l'usumba w'ekila, wufundami lu buku ne.

Diui Dia Daka

20 One lata aui ane kata ati: Ee, layuya esadi! Ayali osoku! Khumadiondjo Jesu, uyi!

Diui Di'Etshokwelo

21 Ngandji ka mamba ka Khumadiondjo Jesu kayali la ekilami tshe! Ayali osoku!